

3. april 2019

UPA2019/88-111

Nunami maani angerlarsimaffeqanngitsut pillugit ajornartorsiuteqarnermut aaqqiissutissanut eqqarsartussamik suleqatigiisitamik suligasuartussamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suleqatigiissitaq politikerinut aaqqiissutissanik tigussaasunik siunnersuuteqassaaq innersuussuteqarlunilu aamma kingusinnerpaamik ulloq 31. august 2019 saqqummiussissaaq suliniutissat akilersornissaannut aaqqiissutissanullu.

(Inatsisartunut ilaasortaq Tillie Martinussen, Suleqatigiissitsisut)

Aamma

Angerlarsimaffeqannginnerup akiorneqarnissaa pillugu iliuusissatut pilersaarummik kigusinnerpaamik UPA2020-mi Naalakkersuisut saqqummiussinissamik peqquneqarnissaat pillugu Inatsisartunut aalajangiiffigisassatut siunnersuut.

(Inatsisartunut ilaasortaq Mimi Karlsen, Inuit Ataqtigiit)

Inatsisartunut ilaasortat Tillie Martinussen, Suleqatigiissitsisut kiisalu Mimi Karlsen, Inuit Ataqtigiit angerlarsimaffeqannginnerup ajoraluartumik alliertortup akiorniarneqarnerani sulinissamut kiisalu ajornartorsiutaasup qaangneriarnissaanut sulinissanut peqqusinerannut Siumumiik ataatsimoortillugit imatut oqaaseqarfigissuarput.

Siullermik oqaatigerusupparput ajornartorsiut imaannaanngittorujussuut isigigatsigu arajutsisimanagulu, taamaammat manna periarfissaaq atorlugu Kommuunit nammineerlutik angerlarsimaffeqannginnerup imaannaanngittup annertusiartunnginnissaa siunertaralugu suliniuteqarnerinut.

Nunarujussuarmi inuuffigisatsinni silatta pissussaa Europap silaanut naleqqiussassaannngilluinnartoq nalunngilarput. kaperlak, seqineq kaaviinnartoq, qattuganeq, anorersuaq, kiak issersuarlu tamaasa atorpagut.

Taamaammat takorlooruminaaqaq angerlarsimaffeqarani nunatsinni inuunissaaq. Ajoraluartumilli ullutsinni taamaattoqarpoq, taamaattoqarneralu milliartunngilaq.

Angerlarsimaffeerunnermut pissutaasut eqqoriarsinnaasagut arlaqarunarput, Siumumiilli maani eqqoriaasaqattaarluta pinissarput kissaatiginngilarput.

Taamaammat ajornartorsiutaasup imaannaanngittup "sumiissusersilluarnissaa" siunertaralugu siunnersuuteqartut taperserlugit ataatsimiitaliami suliarineqarnissaa innersuupparput.